

Dat Billgardspell

Segg käiner, dat Schliarge nich hölpet. Ick bin öll ziemlich bi Jouhre, owwer wenn ick an äiner bestimmten Stelle vobi komme, dann döit mi ümmer no wat wäih, trotzdem siet dän Vofall üarwer seßtig Jouhr vogauhn sind.

Wo jetz'n Modegeschäft is, was fröiher'n Bloumenladen, un wi Blagen han'n tengern spiß kriern, dat unner dän Schaufenster in de Holtvokleidung Löcker wörn, wahrscheinlich wiargen de Lüftung, düar de man owwer ock schön met Stöcker no innen steiten un Bloumenpötte ümmeschmieden konn. Wi nenn'n dat dann Billgardspell.

Dat Spell was natürlick nich ungeföhrlick. Hennerich, de Besitzer von de Görnerigge, hedde us so lichte nicks daun. Dorchén, sinne Fruwwe, was öll leiger, konn owwer nich so tengern laupen öll wi, owwer de Geselle met dän schwatten Spitzbourt, dat was use Schrecken. He hadde öll faken gewittert, wenn he de Bloumenpötte in'n Schaufenster we uprichten moßte.

Äines Dages gingen wi dann we ton Billgardspelln. Äiner von us dräi, un zwar was Annold anne Riege, schlür üarwer de grauten Derl, de Husdüarn stünn'n ja ümmer losse, un kamm met de Meldung wier: „Ölles in Ornung, Dorchén is alläine inne Köarken, de Spitzbourt is nich to Hus.“ Dann konn't ja loßgauhn. Wi setten us in'n Hücksken achter dat Schaufenster, figileern met use Stöckskens düar de Löcker un stödden usen Kriegröup jäidesmaul ut, wenn'n Pott in'n Schaufenster ümmefell. Käiner von uns dachte doan, dat wi dütmaul dat Spell nich gewinnen solln. Wi wörn nich wäinig vojaget, öll plötzlich de Spitzbourt achter us stund un bölke, dat äin Pott, de öll an'n wackeln was, sick vo Schrecken we uprichte. Wi wörn so gelähmt, dat nich moll äiner von us weglaupen konn. De Kerl packe us in'n Nacken un schlür us öll so Kaninkens uppe Derl un make de Düar tou. Dann feng he met us an Billgard to spelln. Wi han'n blouß kläine Stöckskens hat, he hadde son dicken Knüppel. Inne Schoule moßte de Mann auk nich uppasset hämm'n, süß hedde he woll an dän armen Lazarus dacht, wovon et häite: „Sie schlugen ihn und ließen ihn liegen.“ He läit us auk liggen, un de berühmten Klagewiewer könn't nich mähr jommert hämm'n öll wi. Öll wi dann uppe Straute hümpeln, mäine min Vetter, mähr Piene hedde de Lazarus auk nich hat.

Owwer use Leiden wörn no nich to Enne, denn jetz ging de Spitzbourt no use Ellern un votelle dän wat von Schadenersatz fo kaputte Bloumenpötte, un do han'n de just up lurt. Wenn man dann öll blaue Pläcken häf, un do schlött ümmer we äiner up, dann segge käiner, dat dat nich hölpet. Annold hä wi dän annern Dag vowämset, weil he als Kundschafter nich uppasset hadde. Dat Billgardspell hä wi upgiern.